



BILTEN

OPĆINE SREBRENİK



KLASIFIKACIJA IZDAVANJA
BROJ: 15/2010



IZDAJE: OPĆINA SREBRENİK • BROJ: 32 • MJESEC: SEPTEMBAR/RUJAN 2010. • BILTEN JE BESPLATAN • TIRAŽ 500



Foto: Svjetlan Bešić

Bivši predsjednik Hrvatske Stjepan Mesić posjetio Srebrenik

Opredijeliti se za programe i za ljude, koji su se dokazali



Nekadašnji predsjednik Hrvatske i dragi prijatelj BiH i Srebrenika, Stjepan Mesić, dana 16.09.2010. g., na poziv općinskog načelnika Osmana Suljagića posjetio je općinu Srebrenik. Uz velike mjere sigurnosti i jako obezbjeđenje, pred više stotina građana Srebrenika, Mesić je dočekan na ulazu u šetalište Alije Izetbegovića, gdje je položio cvijeće poginulim pripadnicima Armije BiH i HVO-a iz rata 1992-1995. g., a potom i na spomen-kosturnici u parku poginulim pripadnicima NOR-a 1942-1945. g. Potom je pred brojnim novinarima pojasnio svoj odnos prema BiH kao nekadašnjeg predsjednika Hrvatske i vječnog prijatelja naše države. - Ja sam se uvijek zalagao za cjelovitu Bosnu i Bosna to prepoznaje. Istina ima i onih koji su mislili da se ratom mogu ostvariti neki drugi ciljevi. Ali, ja ih moram razočarati. Bosna i Hercegovina će ostati jedinstvena, dakle jedna država, a kakva će unutarnja struktura biti, to će sami građani Bosne i Hercegovine riješiti. Međutim, sigurno je da nema nikakve mogućnosti, koliko god se ko zalagao, da bilo koji dio Bosne i Hercegovine izdvoji iz nje. Mesić je

stigao u Srebrenik i u BiH u najvećem jeku predizborne kampanje, koja se osjeti na svakome koraku, a građanima BiH je poručio: - Ja se nisam došao kandidirati u Bosnu i Hercegovinu, meni je bilo dosta biti na čelu dvije države. Prvo Jugoslavije te potom deset godina na čelu Hrvatske. Ali, ono što bih mojim prijateljima u BiH rekao, dakle svim onima kojima BiH leži na srcu, neka se na izborima opredjeljuju za one programe i za one ljude, koji su se dokazali i koji sigurno imaju snage da ostvare ono što obećavaju. Dakle, da izbori ne budu popis stanovništva tj. nacionalni i vjerski popis, nego da glasaju prema timovima, prema ljudima koji su garancija da će BiH ostvariti napredak. A, to je ulazak BiH u NATO i EU. Predstavnik „sedme sile“ je zanimalo je li Mesić od svoje posljednje posjete primijetio ikakav napredak, kako u Srebreniku, tako i u BiH, na što je on odgovorio: - Mi koji rjeđe dolazimo u BiH, mi sigurno vidimo napredak u ovoj zemlji. Jer vi koji ste zaokupljeni svakodnevnim poslovima, vi to sigurno ne uočavate. Jer kaže se da čovjek ništa ne vidi u šumi, ako nije izvan šume. Tako je i

ovdje. Mislim da onaj koji danas dolazi u BiH, ali posebno ovdje u Srebrenik, vidi koliko je iskoraka napravljeno. Nije samo jedan iskorak, nego puno iskoraka, kazao je za kraj Mesić. Potom je prošetao Trgom Alije Izetbegovića, gdje su ga dočekali mališani u narodnoj nošnji, uručivši mu cvijeće, nakon čega su uslijedili zvuci zurla i bubnjeva, a Mesić je na duhovit način dočeka muzičare, nakon čega je s jednog skinuo fes i stavio ga sebi na glavu, što je izazvalo veliko oduševljenje građana. Novinarima se obratio i načelnik Općine Srebrenik Osman Suljagić koji je kazao: - Jako smo sretni i ponosni što nam je u goste stigao bivši predsjednik Hrvatske, gospodin Mesić. S obzirom da smo se više puta sastajali dok je bio predsjednik Hrvatske, a ja sam bio i na njegovom oproštajnom ručku u Zagrebu. Mi smo ga pozvali na uzvratnu posjetu i zahvalni smo mu što je istu prihvatio, kazao je načelnik Suljagić. Prilikom posjete Srebreniku, između ostalih, bili su



Stjepan Mesić, načelnik Osman Suljagić i predsjedavajući OV-a Ibrahim Zukić su položili vijenac na centralno spomen-obilježje

prisutni hrvatski konzul u Tuzli, Josip Juras, inače počasni građanin Srebrenika, zatim načelnik Tuzle Jasmin Imamović te bivši načelnik Općine Gradačac, Ferhat Mustafić. Stjepan Mesić je sa delegacijom ugošćen u restoranu „Metropol“, a zatim i u hotelu „Orion“ na Ormanici kod Mate Jurića, inače uglednog ugostitelja, gdje je i prije često odsjedao.

Josip Juras - počasni građanin Srebrenika

Na 19. sjednici Općinskog vijeća Srebrenik, koja je održana 10.06.2010.g., generalni Konzul R.Hrvatske u BiH Josip Juras, proglašen je počasnim građaninom općine Srebrenik, a priznanje će dobiti na svečanoj sjednici, koja će se održati povodom obilježavanja 21. juna, Dana općine Srebrenik, kada će se uostalom dodijeliti i druga priznanja. Komisija za općinska priznanja i odlikovanja navela je kako je gospodin Juras dao veliki doprinos u razvoju privrede, turizma te promoviranja i afirmiranja pozitivnog imidža općine Srebrenik izvan granica BiH. Vijećnici su



Sa 19. Sjednice OV-a Srebrenik

također usvojili Prijedlog načelnika Osmana Suljagića da se Udruženju penzionera/umirovljenika odobri 5.000 KM nepovratnih sredstava s pozicije „transfer udruženjima građana“, kako bi oni otplatili dug koji je nastao prema firmi d.o.o. „Herceg“ Srebrenik, za rekonstrukciju zgrade udruženja. Usvojena je i odluka o pristupanju reviziji Plana parcelacije područja u naselju Kiseljak pored korita rijeke Tinje, a riječ je o blizu 30 dunuma zemljišta, koje će biti obuhvaćeno ovim projektom, čime će se stvoriti bolje pretpostavke za razvoj ovoga naselja, a u narednim danima uslijedit će i javna rasprava po ovome pitanju. Bez veće rasprave usvojen je i Program zaštite okolice na području općine Srebrenik za 2010. godinu, kao i Informacija o stanju bezbjednosti za 2009. godinu, gdje je komandir Policijske stanice Srebrenik Edin Karić iznio problem količinski nedovoljnog i zastarjelog voznog parka. Ipak, najviše rasprave izazvala je tačka koja se tiče zajedničke međuopćinske deponije općina Srebrenik i Gradačac, s obzirom da će postojeća deponija u Babunovićima moći da prima otpad najdalje do kraja godine. Predstavnici ovih dviju općina obavili su već nekoliko razgovora i započeli su realizaciju ovoga projekta koji se čini najrealnija alternativa do sada propalom projektu kantonalne deponije.

Za sanaciju šteta iz budžeta 330.000 KM

Na 20. sjednici Općinskog vijeća Srebrenik, koja je održana 8. jula 2010., vijećnici su upoznati sa razmjerama šteta koje su poplave i klizišta, tokom juna 2010.g., prouzrokovale na čitavom području općine Srebrenik. U informaciji je između ostalog navedeno da je 88 stambenih i 196 pomoćnih objekata poplavljeno, kao i oko 800 hektara poljoprivrednog zemljišta, nekoliko privrednih objekata, da su oštećeni brojni nasipi, putevi, vodovodi, groblja te da je aktivirano ukupno 176, što većih što manjih, klizišta koja su trajno uništila 2 kuće a opasno je ugroženo 13 stambenih i pomoćnih objekata, te su 4 porodice izmještene. Samo u dosadašnje radove na hitnim sanacionim mjerama općina je iz budžeta utrošila 170.000 KM, a predstoje radovi na velikom klizištu kod kuće Mehmedović Hazima koje osim kuća direktno ugrožava put za D. i G. Srebrenik, a kojim se saobraćaj ionako odvija otežano i samo jednom saobraćajnom trakom, i koji bi, zbog svog obima i stepena složenosti, trebali koštati blizu 100.000 KM. Vijećnici su upoznati i da je na IX sjednici OpŠCZ Srebrenik, koja je održana 07.07.2010.g., donesena odluka o prestanku stanja prirodne nesreće od poplave i klizanja zemljišta koja je počela važiti od 18,00 sati istog dana, a obzirom na gore navedeno odlučeno je da se minimalna sredstva trebaju preusmjeriti za ove namjene preraspodjelom rashoda u budžetu Općine Srebrenik. Prema usvojenoj odluci 330.000 KM će se utrošiti za sanaciju šteta od poplava i klizišta a odobreno je općinskom načelniku da sa 378.000 KM, naplaćenih od rente i uređenja gradskog građevinskog zemljišta, finasira izgradnju lokalne putne i vodovodne infrastrukture. Ipak, najveću raspravu izazvala je naknada o nepredviđenim radovima na pješaškoj zoni, gdje je izvođač radova „ITK-Musić“ podnio zahtjev da im se za nepredviđene radove isplati 102.100 KM, zbog čega je općinski načelnik ovu tačku dostavio OV na razmatranje. Nakon dugog i iscrpnog razmatranja, usaglašeno je da se ovoj firmi prizna 72.438 KM, a preostali iznos da naknadno utvrde općinske komisije i predstavnici izvođača, te da se o svemu informiše Općinsko vijeće. Donesena je i odluka o uspostavljanju Centra za birački spisak, kao i utvrđivanje odluke da se regionalni put Srebrenik-Sladna proglasi javnim interesom, kako bi se nastavila njegova rekonstrukcija i nakon tvornice „Corn-Flips“. Za općinskog pravobranioca ponovo je imenovan Imšir Škahić i to na period od četiri godine. Na ovoj sjednici OV Srebrenik, novi-stari pravobranilac je položio i svečanu zakletvu, prema kojoj se zakleo da će svoj posao obavljati savjesno i u skladu sa zakonima štiteći interes Općine Srebrenik, uz zahvalnost na podršci i povjerenju. Bez veće rasprave usvojen je i nacrt Programa mjera zdravstvene zaštite domaćih životinja u 2010. godini, kao i informacije o statusu boračke populacije, oblasti poljoprivredne proizvodnje, raseljenih i izbjeglih lica te fizičke kulture i sporta.

Budžet Općine Srebrenika za prvih šest mjeseci u suficitu od 19.568,26 KM

S obzirom na prenešena sredstva iz prošle godine u iznosu od 28.825,66 KM izvršenje budžeta Općine Srebrenik za prvih šest mjeseci ove godine bilo je u suficitu od 19.568,26 KM. To je proisteklo iz činjenice da su ukupni prihodi kao i rashodi budžeta za prvih šest mjeseci bili blizu 3,5 miliona KM, te je kao takav, nakon višeminutne rasprave, i usvojen na 21. sjednici Općinskog vijeća Srebrenik, koja je održana 28.08.2010.g. I dok je opozicija smatrala da je njegovo planiranje početkom



Sa 21. sjednice OV-a Srebrenik

godine bilo nerealno i preambiciozno, jer je od predviđenog godišnjeg budžeta od preko 11 miliona KM, punjenje istog za šest mjeseci svega 30 posto, a ne 50 posto kako bi trebalo, načelnik Osman Suljagić je naveo da je Vlada TK-a već odobrila sredstva za realizaciju projekata predviđenih Programom ulaganja sredstava vodnih naknada u oblasti vodoprivrede u 2010. godini za dva projekta iz naše općine i to za: postrojenje za pripremu pitke vode sa izvorišta Kugičko Vrelo u Srebreniku 50 000 KM te za uvođenje dodatnih količina vode u vodovodne sisteme Ljenobud i Kuge 150 000 KM, a ubrzo se očekuju i ostala znatna sredstva sa viših nivoa vlasti (sredstva za puteve) tako da je realno očekivati kako će većina sredstava sa viših nivoa dolaziti u drugoj polovici godine, tako da će se budžet, do kraja godine približno i realizirati u predviđenom iznosu, ali da se i pored svega mora istaći da se izvršna vlast ponaša domaćinski i u skladu sa trenutnim stanjem tj. da trošimo manje nego što zarađujemo, što je uostalom i pokazao ovaj izvještaj. Izuzev ove tačke, mnogo rasprave je izazvala i tačka koja se tiče izgradnje sportskog poligona u MZ Lušnica, gdje je bilo prijedloga da se ova tačka skine s Dnevnog reda s obzirom da 107 mještana Lušnice ne prihvata da se izgradi poligon na planiranoj lokaciji. S druge strane načelnik Osman Suljagić je kazao da „mnogo više mještana ipak želi da se poligon izgradi na predviđenoj lokaciji i da je u pitanju predizborna igra u kojoj bi opozicija željela da se ništa ne gradi do kraja godine“, tako da je ona i proglašena od javnog interesa, nakon čega će se krenuti u proceduru. Vijećnici su izglasali i da Općina povuče tužbu protiv firme „Jata“ s kojom su 1998. i 1999. godine potpisani ugovori o prodaji

kamenoloma „Orlova klisura“, s obzirom da bi se moglo desiti da Općina iz budžeta plati blizu 700.000 KM bez kamata. Usvojen je i Nacrt Programa o utrošku sredstava za novčanu podršku u primarnoj poljoprivrednoj proizvodnji prema kojoj će se dodijeliti 73.000 KM jednokratne novčane pomoći građanima za saniranje dijela štete u poljoprivredi nastale prirodnim nepogodama te za uginuća sitne i krupne stoke te peradi. Izuzev ovih tačaka, usvojene su i odluke da se građanima i pravnim licima koja su pretrpjeli štete nastale poplavama, iz općinskog budžeta dodijeli 50.000 KM, zatim je regionalni put Lisovići-Jasenica proglašen od javnog interesa, dok je i usvojen prijedlog programa mjera zdravstve zaštite domaćih životinja. Bez većih rasprava usvojen je i zaključak o osnivanju MZ Straža, kao i informacije o socijalnom statusu penzionera, te zaštite od požara i vatrogastva u 2009. godini. Umjesto Alema Hodžića koji je razriješen na ovoj sjednici OV, za predsjednika statutarno-pravne komisije imenovan je Vahid Tursunović, poznati advokat iz Srebrenika.

Mini kotlovnice idealno rješenje za toplifikaciju

P redstavnici austrijske firme „Danfos“ nedavno su boravili u Srebreniku, kako bi prenijeli konkretna iskustva iz toplifikacije manjih gradova u Austriji, a koja će se po svemu sudeći primijeniti i u Srebreniku. - Po onome što su nam predstavili Austrijanci, mi smo gotovo predvidjeli 90% stvari. Dakle, u pitanju je zagrijavanje grada i prigradskih naselja sa mini kotlovnica, a ne sa jednom centralnom kotlovnicom, čija bi izgradnja koštala nekoliko miliona KM, kaže Fahrudin Karić, koordinator projekta toplifikacije Srebrenika. Kako nam je kazao Karić, za početnu investiciju potrebno je obezbijediti blizu milion KM, kako bi već jedan dio Centra započeo sa zagrijavanjem. - U samom Centru je zamišljeno da budu dvije kotlovnice. Jedna u Mješovitoj srednjoj školi koja bi se naravno rekonstruisala i ona bi zagrijavala zapadni dio od Trga Alije Izetbegovića, dakle dvije škole, Dom zdravlja, Sportsku dvoranu, Policijsku stanicu, Općinu..., a druga bi trebala biti u Centru za kulturu i informisanje, te bi ona zagrijavala istočno od šetališta, dakle ovu zgradu, Robnu kuću, Obdanište, Poštu..., ističe Karić. Ovakav primjer u susjedstvu imaju u Gospiću (Hrvatska) te u Vrbovskom (Slovenija) i njihova iskustva govore da je isplativo a jednostavno primjenljivo za naše područje. Zagrijavanje Centra i prigradskih naselja vršilo bi se na bio-masu, a Karić pojašnjava o čemu se radi: - Dakle, u pitanju je drvo i to otpadi od drveta iz šuma, voćnjaka, drvoprerađivačkih firmi, koje je sada vrlo lako pronaći a nisu skupa. Već u proljeće bi se ovo drvo skladištilo i sušilo za zimu. Predviđa se da bi priključak na centralno grijanje svakog korisnika koštao između 600 i 700 KM, što bi se plaćalo u mjesečnim ratama, dok bi cijena grijanja po kvadratnom metru koštala najviše 2 KM.

Svečani prijem povodom Dana općine

U povodu 21. juna, Dana općine Srebrenik, općinski načelnik Osman Suljagić je 18.06.2010.g. upriličio svečani prijem za učenike generacije iz osam osnovnih škola i Mješovite srednje škole Srebrenik. Uputivši im iskrene čestitke na ostvarenom uspjehu u dosadašnjem školovanju, načelnik Suljagić je najboljim uručio i prigodne novčane nagrade koje bi, kako je istakao, trebale predstavljati dodatni podstrek za ostvarivanje dobrih rezultata i u nastavku njihovog obrazovanja.

Učenici generacije školske 2009/2010 g.

- 1) *Amila Harčinović (Prva OŠ)*
- 2) *Irma Hadžić (Druga OŠ)*
- 3) *Igor Lukanović (OŠ Podorašje)*
- 4) *Majda Sinanović (OŠ Tinja)*
- 5) *Aida Hasanović (OŠ Špionica)*
- 6) *Semir Omerović (OŠ Rapatnica)*
- 7) *Alma Glotić (OŠ Duboki Potok)*
- 8) *Alma Bešić (OŠ Sladna) i*
- 9) *Bojana Stojanović (MSŠ Srebrenik).*

U okviru obilježavanja Dana općine Srebrenik, načelnik Suljagić je organizirao svečane prijeme i za mališane iz Dječijeg obdaništa, dobitnike najviših ratnih priznanja i odlikovanja, učenike iz šehidskih porodica i predstavnike boračkih udruženja s područja ove općine.

Dani otpora općine Srebrenik 2010

Dana 20.06.2010.g., u Domu kulture u Srebreniku, održana je svečana proširena sjednica boračkih organizacija s područja srebreničke općine, kojom su zaokružene sedmodnevne aktivnosti u okviru manifestacije „Dani otpora općine Srebrenik 2010.“. Riječ je o tradicionalnoj manifestaciji srebreničkih boračkih udruženja kojom se na jednom mjestu obilježavaju svi značajniji datumi iz ratnog perioda na području ove općine. Nakon prisjećanja na prve dane organizovnog otpora agresiji na BiH naroda srebreničkog kraja i ratnog puta 211. i 212. srebreničke brigade, uručena su priznanja zaslužnim pojedincima i kolektivima s područja ove općine. Za doprinos u odbrani BiH „Zlatne plakete“ su posthumno dodijeljene Ismetu Bašiću, komandiru Špionjačke čete i Begi Kešetoviću, prvoj žrtvi agresije na BiH na području srebreničke općine. Za doprinos u odbrani BiH „Zlatne plakete“ su uručene i Joki Amidžić, Mevludinu Kariću, Nedžad Šabuljiću, Mirsadu Hasanoviću, Vahidinu Šabuljiću, Sulejmanu Fejziću, Osmi Mujačeviću, Aganu

Husariću, Rivezu Kariću, Džemalu Tursunoviću, Mirsadu Mutapčiću, Kerimu Avdiću, Ibri Ibriću, Muhamedu



S manifestacije „Dani otpora općine Srebrenik 2010“

Joldiću, Edhemu Avdiću, Fahrudinu Ibriću, Sakibu Hodžiću i kolektivu Lokalne televizije Srebrenik. Polaganjem cvijeća na centralno šehidsko spomen-obilježje i učenjem fatihe učesnici svečane sjednice odali su dužno poštovanje 223 srebreničkih boraca koji su ugradili svoje živote u temelje suverene BiH.

Održano "Veče saza i sevdaha"

Povodom 21. juna, Dana općine Srebrenik, na platou ispred fontane u centru Srebrenika, dana 18.06.2010.g. održana je tradicionalna manifestacija „Veče saza i sevdaha“. Istinski ljubitelji izvorne muzike, kojih je nažalost bilo veoma malo, imali su priliku uživati u zvucima saza poznatih sazlija Osmana Suljkanovića, Suada Džanića, Mehmeda Šiljića, Ahmeta Hogića, Enesa Imamovića, Sulejmana Šarića, Rajka Simeunovića i jednog od najboljih bh. sazlija dr. Hašima Muharemovića. Veče saza zajednički su organizirali Klub sazlija i Bošnjačka zajednica kulture „Preporod“ Srebrenik.



Nastup dr. Hašima Muharemovića

Održan VI memorijski međunarodni šahovski turnir "Džafer Hogić"

U organizaciji Šahovskog kluba „Srebrenik“, povodom 21. Juna, Dana općine Srebrenik, u Domu kulture Srebrenik, dana 19.06.2010.g., održan je Šesti memorijski šahovski turnir „Džafer Hogić“, na kojem je nastupilo 108 igrača, uključujući i 10 velemajstora i po 8 internacionalnih i FIDE majstora iz BiH, Srbije, Hrvatske, Crne Gore i Švicarske. Igralo se devet kola po Švicarskom sistemu s tempom igre od 14



Zoran Novoselski

po igraču, a najuspješniji je bio internacionalni majstor Zoran Novoselski iz Srbije, koji je sakupio 7,5 poena. Od 2 do 8 mjesta sa po 7 poena, plasirali su se velemajstori Miodrag Savić, Goran Čabrilo, Danilo Milanović, Bojan Kurajica, Davor Rogić i Miroljub Lazić, te internacionalni majstor Zoran Runić. Na devetom mjestu sa 6,5 poena je Dragiša Blagojević, a na desetom sa istim brojem poena, ali slabijim dodatnim kriterijima je velemajstor Emir Dizdarević. Ukupan nagradni fond turnira je 2.700 KM, a uz 10 najbolje plasiranih igrača, novčane nagrade su dobili i Hamza Mujić, Samir Smajlović i Adis Mumanović kao najbolje plasirani igrači Šahovskog kluba „Srebrenik“, Nijaz Smajlović za najbolje plasiranog igrača bez FIDE rejtinga, Denis Kadrić za najbolje plasiranog igrača do 18 godina, Dragana Nešić kao najbolje plasirana šahistkinja i Slobodan Martinović kao najbolje plasirani veteran.

Održan Zbor radio-amatera

U organizaciji Radio-kluba (RK) „Srebrenik“, na lokalitetu „Lipici“ na vrhu planine Majevica u blizini Srebrenika, održan je Zbor radio-amatera, na kojem je učestvovalo preko 250 predstavnika radioamaterskih klubova iz BiH i Hrvatske. U okviru trodnevni susreta održana je godišnja Skupština Asocijacije radioamatera BiH, a upriličena su i takmičenja u više radioamaterskih disciplina. U kategoriji „brzina uspostave radio-centra u slučaju teških saobraćajnih nezgoda“ prvo mjesto je osvojio RK „Goražde“, na drugom mjestu je ekipa RK „Srebrenik“, a na trećem RK „Stjepan Polje“. Na kvizu znanja iz oblasti tele-



Najuspješnija ekipa Radio kluba Tuzla

komunikacionih sistema i elektronike najbolja je bila ekipa RK „Stjepan Polje“, a na drugom mjestu je RK „Majevica“ iz Teočaka. U „ARG“-u, najzahtjevnijoj radioamaterskoj disciplini, najuspješniji je bio RK „Tuzla“, drugo mjesto ravnopravno dijele RK „Stjepan Polje“ RK „Zenica“, a treća je ekipa RK „Brčko“.



Radio klub Srebrenik

Najuspješnijim ekipama i pojedincima uručene su medalje i plakete, a prelazni pehar dodijeljen je RK „Tuzla“ kao najboljoj ekipi.

Hercegu "Radničke igre 2010"

Ekipa „Herceg“ d.o.o. Srebrenik, pobjednik je „Radničkih igara-Srebrenik 2010“ u malom nogometu, koje je organizovala JU „Sportsko-rekreativni centar“ Srebrenik. Pobjednički tim je u finalnom susretu uvjerljivo savladao ekipu „Sidoil“ sa



Ekipa „Herceg“ d.o.o. Srebrenik

7:2, dok je u duelu za treće mjesto „Polijska stanica“ Srebrenik bila bolja od „Udruženja ilmiye“ sa 2:0. Za najboljeg golmana proglašen je Alen Jahić a strijelac je Nihad Taletović iz pobjedničke ekipe sa 14 pogodaka, dok je nagradu za Fer-plej dobila ekipa „Željeznice FBiH“. Na ovogodišnjim „Radničkim igrama“ učestvovalo je 12 područja općine Srebrenik.

Svečano obilježen 21. juni, Dan općine Srebrenik

Svečano obilježavanje 21. juna, Dana općine Srebrenik, započelo je polaganjem cvijeća na Centralnom spomen-

šen je i počasni građanin općine Srebrenik a to je gosp. Josip Juras, generalni konzul R. Hrvatske u BiH sa sjedištem u Tuzli. Takođe, po

Nihada Jusića, a Zahvalnice su uručene: Vehbiji Mehuljiću, Senahidu Buljubašiću-Buci, Suadu Jašareviću, Građevinskom odboru „Džamija Potpeć“, Feridu Joldiću, Enesu Džaniću, Irfanu Musiću i Samiru Arnautoviću. Novčane nagrade dobili su najbolji učenici i sportisti: Bojana Stojanović, Eldin



Počasni građanin općine Srebrenik je gosp. Josip Juras

obilježju šehidima i poginulim borcima 1992-1995, na Trgu Alije Izetbegovića i na spomen-kosturnici palim borcima NOR-a 1942-1945 u gradskom parku. Svečanu sjednicu otvorio je predsjedavajući OV-a Srebrenik Ibrahim Zukić, dok se gostima obratio i načelnik Osman Suljagić koji je između ostalog kazao: - Ovo je dan kada se sjećamo na oslobađanje općine Srebrenik od okupatora 1992. godine. Tada smo pokazali koliko smo tvrdi, poput tvrđave Starog grada iz 1333. godine, koja i predstavlja simbol



Delegacija OV-a položila je cvijeće na spomen kosturnicu i proučila fatihu

općine Srebrenik. U nastavku manifestacije, po prvi puta, progla-

prvi puta ove godine, proglašen je i humanista godine, a ova čast pripala je Fahiru Zukiću-Butri iz Lisovića. Potom je uručeno 5 Plaketa koje su dobili: Mustafa Herceg, Ismet ef. Mustajbašić (posthumno), MZ Kiseljak, dr. Zlatko Šimić i B.Z.K. „Preporod“, nakon čega je uručeno 5 Povelja za: Mustafu Buljubašića-Tarasa, JU „Prva osnovna škola“, Zlatu Hogić, dr. Avdu Babovića i



Povelju je dobila i Zlata Hogić, glavna medicinska sestra Doma zdravlja Srebrenik

Omić, Merisa Šabić, Almedina Osmančević, Munira Mehić i Melisa Hasanbegović. Ovoj sjednici osim predstavnika domaće zakonodavne i izvršne vlasti, predstavnika vjerskih zajednica te NVO-a i medija, prisustvovali su i brojni ugledni gosti, a među njima su bili pred-



Neki od dobitnika općinskih priznanja



Detalj sa otvorenja TS 35/10kV u Tinji

sjedavajući Skupštine TK-a Amir Fazlić, ministri u Vladi TK, Sead Bećirović, Bahrija Mehurić, Faruk Vikalo, zatim načelnik općine Gradačac Fadil Imširović, općine Čelić Sead Muminović, predsjedavajući OV-a Banovići Nermin Velagić, gradonačelnik Vinkovaca Mladen Karlić sa saradnicima..., kao i mnogi drugi gosti. Svečana sjednica završena je



Sjednici su prisustvovali brojni ugledni gosti

prigodnim kulturno-zabavnim programom. U nastavku programa obilježavanja 21. Juna, Dana općine Srebrenik, načelnik općine Srebrenik Osman Suljagić, izvršni direktor za distribuciju „Elektrodistribucije“ Tuzla Enver Jamak i predsjednik Skupštine Tuzlanskog kantona Amir Fazlić simboličnim presjecanjem vrpce pustili su u funkciju novoizgrađenu trafostanicu 35/10 kV, snage 8MVA, u naselju Tinja. U okviru ovog projekta, rekonstruisan je postojeći i izgrađen novi priključni 35 kV dalekovod Dobrnja-

Tinja i pripadajući 10 kV dalekovodi ukupne dužine 12 kilometara. Na novu trafostanicu 35/10(20) kV bit će priključeno ukupno 45 trafostanica 10/0,4 kV napona s blizu 4.000 kupaca električne energije. Izgradnjom novih energetske postrojenja i priključnih dalekovoda riješen je problem sa snabdijevanjem električnom energijom građana mjesnih područja Tinja, Duboki

trojenja osigurane su i pretpostavke za priključenje na elektromrežu novih privrednih objekata koji se planiraju graditi u industrijskim zonama na ovim mjesnim područjima. „Pored pozitivnih efekata za građane i potencijalne investitore, bitno je naglasiti da su nova energetska postrojenja izgrađena vlastitim znanjem i u proizvodnim pogonima domaćih proizvođača „Delinga“ i „Umel dalekovodmontaže“. Zbog toga, danas s ponosom prezentiramo domaće proizvode, koji su certificirani u jednoj od prestižnih evropskih laboratorija i u koje su ugrađeni pamet i rad domaćih inženjera i proizvodnih radnika. U proizvodnji i montaži primijenjeni su evropski standardi u ovoj oblasti, a realizacija ovog projekta predstavlja najbolji model za podsticaj domaćoj privredi i uključenje bh. privrednih subjekata u savremene tehnološke tokove“, istakao je Izet Džananović, direktor „Elektrodistribucije“ Tuzla, najavljujući izgradnju nekoliko novih objekata sličnih karakteristika, kojima će se napraviti novi iskorak u približavanju evropskim normama, koje važe za elektrodistributivne kompanije. U izgradnju novih ener-



Unutrašnjost TS 35/10kV

Potok i Podorašje, te potrošača na području Dobrnje u susjednoj općini Tuzla. Uz to, izgradnjom ovih pos-

getskih postrojenja i priključnih dalekovoda u Tinji uloženo je oko 2 miliona konvertibilnih maraka.

Obilježena 18. godišnjica pogibije pripadnika Špioničke bojne

U prisustvu porodica poginulih branitelja i brojnih mještana, te predstavnika Udruge dragovoljaca i veterana domovinskog rata HVO Srebrenik, srebreničkih boračkih udruženja



Fra Blaž Marković: Oni su dali svoje živote za ideju slobode

proisteklih iz Armije BiH i općinskih vlasti, u Srednjoj Špionici kod Srebrenika na prigodan način je obilježena 18. godišnjica pogibije pripadnika „Špioničke bojne“ 108. pješačke brigade HVO Ravne Brčko. Prisjećajući se petorice poginulih branitelja iz Srednje Špionice, od kojih su trojica stradala zajedno 28. avgusta 1992. godine u borbi protiv četnika na linijama odbrane u naselju Cerik, fra Blaž Marković, župnik Župe Špionica naglasio je da su oni dali svoje živote za ono što je naj-



Vijenac je položila i delegacija Općine Srebrenik

bolje u ljudima i za ideju slobode. U znak sjećanja na poginule pripadnike Špioničke bojne Miju Gudeljevića, Ivu Veselčića, Ivu Dežića, Franju Gudeljevića i Josipa Veselčića, od kojih je najstariji u vrijeme stradanja imao svega 29, a najmlađi samo 20 godina, brojne delegacije su položile vijence na centralno spomen obilježje poginu-

lim i nestalim mještanima Špionice u Drugom svjetskom ratu, te poginulim braniteljima iz ovog naselja u proteklom ratu u BiH. U okviru obilježavanja ove godišnjice održana je i sveta misa za poginule pripadnike Špioničke bojne, a organiziran je i obilazak grobalja i paljenje svijeća na grobove poginulih branitelja.

Kamen temeljac za šehidsko-spomen obilježje



Sa polaganja kamen-temeljca spomen obilježja u Cagama

U okviru obilježavanja Dana MZ Cage, načelnik općine Srebrenik Osman Suljagić, u prisustvu predstavnika boračkih udruženja, porodica šehida i mještana, u centru ovog naselja položio je kamen temeljac za šehidsko-spomen obilježje. Kako je istakao Enad Osmić, predsjednik MZ Cage, na osnovu idejnog rješenja arhitekta Ibrahima Barjaktarevića, šehidski spomenik će biti stepenastog oblika čiji će središnji dio biti visok 5 metara, a na njegovim pločama će biti ispisana imena 21 mještana Caga, koji su u borbi za odbranu BiH položili svoje živote. Predračunska vrijednost spomen-obilježja je 19.500 KM, a sredstva će, prema riječima Osmića, osigurati općina Srebrenik i Ministarstvo za boračka pitanja u Vladi TK-a. U toku je tenderska procedura za izbor najpovoljnijeg izvođača radova, a prema uslovima iz tendera šehidsko spomen-obilježje trebalo bi biti završeno u roku od dva mjeseca.

Katastrofalne poplave i klizišta na području općine Srebrenik

Kiša, koja je intenzivno padala 24 sata, dana 22.06.2010.g., prouzrokovala je katastrofalne, do sada nezabilježene, poplave i klizišta na području kompletne općine Srebrenik. Poplavljeno je bilo preko 175 stambenih i poslovnih te oko 200



Ul. Hasana Kikića pod vodom

pomoćnih objekata, poplavom je bilo zahvaćeno preko 800 hektara obradivog poljoprivrednog zemljišta na kojima su usjevi potpuno uništeni, a zabilježeno je preko 175 što većih što manjih klizišta, koji su opasno ugrozili i brojne porodične objekte te 17 putnih pravaca i 6 vodovoda. Od centra Srebrenika su bila odsječena naselja Srednje Špionice, Cerik, Gornji Hrgovi, a presječen je bio i magistralni put Tuzla-Orašje ispod tunela u Ormanici. Od poplava su bila direktno ugrožena naselja uz korito rijeke Tinje, posebno njenog donjeg toka od Srebrenika do Ormanice, te njenih pritoka i brojnih lokalnih potoka, tako da je najgore stanje bilo na području Špionice Centar, NN Bara, NN Luka i NN Sječe, iako je stanje bilo loše i u



Klizište u Dedićima

Previlama, Tinji i Dubokom Potoku te drugim mjestima, gdje su se, zbog začepljenih odvodnih kanala, formirala prava mala jezera i u mnoge kuće je ušla površinska voda. Tom prilikom na mjernoj letvi na

rijeci Tinji na mostu u Barama, izmjerena je visina od 4,2 metara, što je do sada rekordni izmjereni nivo. Svakodnevno su održavane vanredne sjednice Štaba CZ Srebrenik, na kojoj su formirane ekipe koje su obilazile teren i konstantno dojavljivale promjene na terenu, a nakon što je, na prijedlog OŠCZ Srebrenik, općinski načelnik Osman Suljagić donio Odluku o proglašenju stanja prirodne nepogode od poplava i klizanja tla na području općine Srebrenik, angažovana je i Služba zaštite i spašavanja od rušenja, koja je sa svom mehanizacijom i ljudstvom bila na terenu, gdje je pojačavanjem nasipa i čišćenjem vodotoka, uspjela pomoći u zaustavljanju vodene stihije u prodoru ka naseljima NN Kiseljak i Bare, gdje je bilo ugroženo oko 1000



Poplavljeno je bilo i NN Luka

stambenih i poslovnih objekata, dok pomoći nije bilo za Špionicu Centar, gdje je od Tinje i Bistričke rijeke, gotovo kompletno naselje bilo poplavljeno, kao i mjesni ured, lokalna ambulanta, objekat Pošte te brojni stambeni i poslovni objekti ("Voćni rasadnik," SRC "Orion" Ormanica, punionica vode). Slična situacija je bila i u NN Luka i NN Sječe gdje se izlila Slanjanska rijeka i gdje je bilo poplavljeno nekoliko desetina porodičnih kuća, kao i u NN Bara, gdje je najteža situacija bila u Ul. Hasana Kikića, gdje je takođe poplavljeno na desetine porodičnih objekata. Dva dana nakon toga Tinja i njene pritoke su se povukle u svoja korita ostavljajući iza sebe pravu pustoš. Ukupna šteta se procjenjuje na preko 1 milion maraka. Svi putni pravci su bili prohodni iako su mnogi pretrpjeli znatna oštećenja,



Oštećen je i put za G. Hrgove

tako da se saobraćaj odvijao otežano kao što je slučaj sa putevima za Seonu, Gornje Hrgove, Cerik, Srednju Špionicu, Čekaniće, Zubovo Brdo, Gornji Srebrenik, Ramiće, Hureme i u sanaciju istih su uložena značajna sredstva iz budžeta Općine. Najteže stanje je bilo na velikom klizištu u Dedićima iznad kuće Hrnjić Hajke, gdje je bio znatno oštećen i lokalni put za Dediće i Seonu i isto je, angažovanjem Službe zaštite i spašavanja i uz velika novčana sredstva i sanirano. Iz sigurnosnih razloga su izmještene ugrožene porodice koje su živjele u navedenoj kući. Evakuisane su i porodice Kraljević Svemira iz Behrama te porodica Hasanović Elvira iz Centra Špionice, dok su, zbog klizišta koje oštećuje njihove porodične kuće, bile izmještene, kod komšija i rodbine, porodice Fejzić Mehmeda iz Gornje Tinje te Joldić Sabahe iz Kuga. Ukupno je zbog poplava i klizišta bilo evakuisano 39 porodica. Donesena je i naredba o



Poplavljen put za G. Hrgove

zabrani saobraćaja za sva teretna motorna vozila na putu Srebrenik - G. Srebrenik, zbog sanacije velikog klizišta na Bijelića brdu kuće Hazima Mehmedovića i Karić Dževada, čija sanacija, uz velika novčana sredstva i uz angažman prof.dr. Izeta Žigića, još uvijek traje.

Intervju sa načelnikom općine Srebrenik g. Suljagić Osmanom

U godini recesije za infrastrukturne projekte oko 3,5miliona KM

Aktuelni načelnik općine Srebrenik, Osman Suljagić, na funkciji prvog čovjeka ove Općine se nalazi već treći mandat. Iza njega su brojni uspješni projekti, a planirani su i još neki koji bi Srebrenik učinili još prosperitetnijim i privlačnijim za mlade, ali i za one koji žele ulagati na ovome općinskom području. U intervjuu načelnik Suljagić govori o tome šta je urađeno u proteklih 365 dana na ovom općinskom području, zatim o novim projektima iz oblasti putne, vodovodne, kanalizacione, elektro-energetске infrastrukture, razvoju turizma, formiranja poslovnih zona...



Gospodine načelniče, ove godine se sve glasnije govori o razvoju turizma na području općine Srebrenik. Šta je u tom pogledu urađeno a šta će se uraditi?

U 2009. godini općina Srebrenik je, kao jedna od deset općina u BiH, ušla u projekat Vlade Španjolske za razvoj kulture. Mi smo nakon aplikacije dobili 100.000 KM. Od ovih sredstava planiramo da na Starom gradu uradimo ulaz, suvenirnicu i jedan podizni most ispred Starog grada. Ove godine u toku je izrada projekata za



Stari grad: Započinje aktivniji razvoj turizma

parking prostor ispod džamije, uređenje prilaznog puta, prilazne staze, kao i pozornice ispred ulaza u Stari grad. Ova sredstva će biti obezbijedena iz Ministarstva za kulturu i sport FBiH u iznosu od 130.000 KM, zatim Turističke zajednice TK 75.000 KM, fondacije „Odras“ u visini od 150.000 KM, dok će Općina Srebrenik u ovome projektu učestvovati sa 100.000 KM. U skladu sa projektnom dokumentacijom u 2011. godini planirano je

konkretno uređenje Starog grada, kao i izgradnja vidikovca. Kad zaokružimo ukupan projekat sa Starim gradom, imat ćemo sve pretpostavke za brži razvoj turizma, kao i kulturno-historijskog turizma. Mi izuzev Starog grada imamo i niz drugih lokaliteta koje možemo pokazati turistima koji budu posjećivali općinu Srebrenik.



Nedavno je upriličeno potpisivanje ugovora sa izvođačima radova, koji će raditi na sanaciji i rekonstrukciji 35 lokalnih putnih pravaca na kompletnom općinskom području. Iako je iza nas godina recesije, ipak je i do sada urađeno nekoliko putnih pravaca. O kojim projektima se radi?

U proteklih godinu dana urađen je put Lisovići-Podoraše vrijedan 750.000 KM, koji je finansirala Općina Srebrenik, Direkcija cesta TK te Ministarstvo za promet i komunikacije FBiH. Zatim tu je dionica Regionalnog puta kroz naselje Luka vrijedan 505.000



Sanirana je izuzetno oštećena dionica reg. puta kroz NN Luka

KM, koji je sa Općinom Srebrenik finansirala Direkcija cesta TK. Također je u naselju Luka urađen sokak u vrijednosti od 20.000 KM. Treba napomenuti i put kroz naselje Brda koji se spaja sa Regionalnim putem Srebrenik-Gračanica vrijedan 90.000 KM, zatim sokak koji spaja Babunoviće i Brda tzv. „Kanatić“ u kojeg je investirano 15.000 KM, dok je urađen i put u Brašničima u MZ Tinja vrijedan 20.000 KM. Bilo je i nekoliko manjih intervencija na sokacima u MZ Kiseljak, u šta je Općina utrošila blizu 15.000 KM, dok je dio novca obezbijedila i MZ Kiseljak. Putna mreža na području općine Srebrenik skoro je u potpunosti modernizirana, dok imamo manjih problema na nekoliko putnih prava, prije svega na dionici Jasenica-Crveno Brdo koji je podložan odronima. Pokušat ćemo to rekonstruisati, a ove godine nastojat ćemo da asfaltiramo novi putni pravac Jasenica-Crveno Brdo, koji je ipak manje podložan klizištima. Nedavno je završena sana-





Sanacija dijela tkz. „Putu spasa“ kroz Majevicu

cija jednog dijela tkz. „Putu spasa“ od Gornjeg Srebrenika do Rašljanina, koji je probijen početkom ratnih dejtava 1992. godine, te bio jedina komunikacija slobodne brčanske teritorije sa ostatkom BiH. Tada je probijen put kroz Majevicu dužine preko 10 km, kako bi se to područje spojilo s Tuzlom. Dugo je postojala ozbiljna namjera da se ovaj put sanira kako bi, ako ništa drugo, postao dio turističke ponude ovog kraja, a do djelimične realizacije namjere je došlo ovih dana. U prvom dijelu je predviđena sanacija preko 1km puta od Gornjeg Srebrenika ka Rašljanima, i, obzirom da se krenulo sa sanacijom sa srebreničke teritorije, administracija općine Srebrenik je finansirala izradu kompletne projektno-tehničke dokumentacije, dok je radove u vrijednosti od oko 80.000 KM finansirala Vlada Brčko Distrikta. Radove je izvela firma „Zvornik putevi“. Nakon završenih svih tenderskih procedura, nedavno smo potpisali i ugovore sa izvođačima radova, koji će raditi na sanaciji i rekonstrukciji 35 lokalnih putnih pravaca na potpunom općinskom području. Tako je firma „Zvornik putevi“ d.o.o. Sapna dobila poslove ukupne vrijednosti u iznosu od oko 1 milion



Za sanaciju reg. puta kroz Babunoviće 600000 KM

KM, firma „ITK Musić“ d.o.o. Srebrenik dobila je poslove ukupne vrijednosti u iznosu od oko 600.000 KM, dok je firma „Bašanović“ d.o.o. Lukavac dobila poslove vrijednosti od oko 350.000 KM. Odmah kreću pripremni radovi a prioritet će imati oni putni pravci za koje su mještani već obezbijedili vlastito učešće. Završeni su tenderi i za putne pravce: Donji Moranjci, Badelka-Donja Špionica, Srebrenik-Gornji Srebrenik te u Tinji zaseok Bajrići, ali da će njihova realizacija

uslijediti nešto kasnije. Obzirom da je firma „Zvornik putevi“ d.o.o. Sapna nedavno započela radove na rekonstrukciji teško oštećenog regionalnog puta Srebrenik-Gračanica (dionica od fabrike Corn flips do čitaonice u Babunovićima) ukupne dužine 1 kilometar i vrijednosti od oko 600.000 KM, a da je finansijer radova Direkcija cesta TK-a obećala ubrzano raspisivanje tendera za još 1 kilometar istog puta od mjesne čitaonice do sanitarne deponije iznad Babunovića, te da je završen tender i da se uskoro kreće sa radovima na rekonstrukciji regionalnog puta Preville-Čelić od Podorašja do Jasenice u dužini od 1560m, evidentno je da je srebrenička općina, i u vremenima krize i recesije, veliko gradilište, obzirom da će se samo u navedene infrastrukturne projekte u ovoj godini utrošiti oko 3.500.000 KM.



Srebrenik nema riješeno pitanje industrijske zone. Može li se uskoro očekivati rješavanje ovog problema?

U narednom periodu planirat ćemo formiranje industrijskih zona u mjesnim područjima Tinja, Špionica i Sladna. Imamo nekoliko inozemnih ponuda za izgradnju proizvodnih kapaciteta u Špionici, ali uslov je da obezbijedimo prostor za formiranje industrijske zone. Brojni su problemi koje moramo rješavati u hodu i u tome imamo uspjeha. Nedavnim puštanjem TS 35/10 kV, snage 8MVA, u naselju Tinja sa priključnim dalekovodom, investicije vrijedne 2 miliona KM, osigurane su i pretpostavke za priključenje na elektromrežu novih privrednih objekata koji se planiraju graditi u budućoj industrijskoj zoni na ovom mjesnom području. Nedavno je, zahvaljujući velikom angažmanu građana, koji su besplatno ustupili zemljište, obezbijeden i put širine 6m za industrijsko zemljište (cca oko 30 duluma) ispod pekare i fabrike „Corn Flips“, tako da i ovaj prostor sada postaje veoma zanimljiv investitorima. U svakom slučaju stvaramo pretpostavke i nadamo se skorom formiranju industrijskih zona.



I pored relativno dobrog stanja sa pitkom vodom na području Općine, nekoliko mjesnih zajednica ima problema sa kvalitetnim napajanjem vodom?

Gradsko i prigradska područja imaju kvalitetnu vodu i u dovoljnim količinama. Kod ostalih mjesta problem je što prvo mora pronaći kvalitetan izvor vode, što je do sada bio problem jer i pored brojnih i veoma skupih geo istraga, nismo uspjeli pronaći kvalitetene izvore pitke vode. S tim u vezi odlučili smo aktivnosti voditi u dva smjera i to: 1) pripajanje bližih MZ-a na gradski vodovod i 2) pronalaženje novih i uvezivanje postojećih izvora pitke vode u sistem onih MZ-a koje imaju problema sa vodosnabdijevanjem. Nakon što su riješeni brojni imovinsko-pravni problemi, potpisan je ugovor sa



firmom „Roading“ d.o.o. Gračanica za ugradnju filterskog postrojenja na izvoru Kugičko vrelo. U pitanju je instaliranje uređaja za obaranje mutnoće kao i izgradnju jednog rezervoara od 100 kubnih metara, koji bi praktično bio rezervni rezervoar za prečišćenu vodu. Vrijednost ugovora je oko 200.000 KM, a ugradnja opreme bi trebala početi ubrzo. Upravo s tim, trenutno radimo kako bi se mjesne zajednice Ljenobud i Kuge spojile na Gradski vodovod. Ove radove u vrijednosti od oko 520.000 KM će izvoditi „Reweus“ d.o.o. Lukavac a isti bi trebali startati do štampanja Biltena. S tim u vezi urađena je i projektno-tehnička dokumentacija priključka vodovoda u Behramima, Dedićima i Šahmerima na gradski vodovod – spoj u Uroži, te da ubrzo slijede naredne aktivnosti u šta bi u narednom periodu trebalo biti investirano blizu 350.000 KM. Ima nekih manjih zahvata na vodovodnim sistemima, koje planiramo već ove godine okončati u Zahirovićima uključujući kompletno izvoriste „Stare kasarne“ na Jeličiću čime bi Zahirovići i Kurtići riješili problem vodosnadbijevanja. Također, privodi se kraju pripajanje u sistem bunara koji je urađen na Krušiku vodovodnog sistema Podorašja, Lisovića, Brezika, Brezja i Previla. I na tom dijelu ćemo morati uraditi uređaj za odvajanje neželjenih primjesa u vodi. Vrijednost ovih investicija je blizu 1 milion KM. Smatram da ćemo do kraja godine uraditi ove vodozahvatne sisteme, a ako i ne uspijemo sve uraditi oni su prioritet u 2011. godini. Problem vodosnadbijevanja imamo i u mjesnom području Tinja. Nedavno je potpisan ugovor o hidrogeološkim istragama na MP Tinja i Duboki Potok sa firmom „Geosonda“ d.o.o. Tuzla i to s druge strane Klisure, jer stručnjaci smatraju da bi se tamo mogla pronaći voda. Nedavno je završena rekonstrukcija vodovodnog sistema u MZ Tinja. Stanovnici su zadovoljni jer je napajanje vodom znatno kvalitetnije. Želimo da u ovoj prvoj fazi riješimo vodosnadbijevanje Centra Tinje, a zatim da širimo ovu mrežu postepeno prema Potpeću. Mislim da možemo doći do povoljnih kreditnih sredstava iz Razvojne banke FBiH jer ova institucija podržava ovakve vrste projekata.



Dosta je i neriješenih kanalizacionih krakova?

Kada je u pitanju kanalizaciona mreža, imamo urađen projekat za cijelo općinsko područje. Što se tiče samog Centra on je potpuno završen. Od većih zahvata u kanalizacionoj mreži ostao nam je Duboki Potok 3, Stari Babunovići, dva kraka u Brdima, te Barama. Planirano je da se ovo finansira u tri godine kroz tri jednake rate. Nedavno je potpisan ugovor sa firmom „Zvornik putevi“ d.o.o. Sapna na odvodnji površinskih voda u Barama, projektu vrijednosti od oko 295.000 KM, kao i ugovor vrijednosti 176.000 KM sa firmom „ITK Musić“ d.o.o. Srebrenik za realizaciju

kanalizacije u Starim Babunovićima, kao i Brdima i Grabovcima.



Korićenjem Tinje od poplava je spašeno uže gradsko jezgro. Kada se može očekivati nastavak ovog projekta prema prigradskim i ostalim naseljima?

Krajem 2009. godine završena je druga faza realizacije korita rijeke Tinje čija je vrijednost 760.000 KM, tako da je sada Tinja ukorićena uzvodno sve do mosta u MZ



Korićenje Tinje: Zaustavljene poplave

Kiseljak. Trenutno se radi na izradi projektne dokumentacije da se nastavi sa korićenjem Tinje od „Koprića mosta“ do stočne klaonice „Bašić“ u Čehajama, u šta će se investirati blizu 1,5 miliona maraka, te vjerujem da će se započeti sa ovim projektom već početkom naredne godine, što je treća faza.



Dosta je urađeno i po pitanju javnih rasvjeta. Šta se planira u ovoj godini po tom pitanju?

Što se tiče javnih rasvjeta urađeno je mnogo i najbitnije je da se radi planski. U samom gradu u značajnom dijelu je izvršena rekonstrukcija i modernizacija javne rasvjete a ove godine u sklopu održavanja iste postavljene su brojne štedne sijalice, koje daju istu osvijetljenost a znatno manje troše, tako da će se ta investicija otplatiti već tokom ove godine. Brojni sitni zahvati su urađeni na javnim rasvjetama u ulici koja vodi do centra grada ka NN Kiseljak, u MZ Srebrenik 2, Mehmeduša 2, Čehajama, Barama..., od kojih svaki košta po par hiljada KM tako da to ispadne značajna stavka. Nedavno je potpisan ugovor vrijednosti 65.500 KM sa firmom „Magnet I“ d.o.o. Brčko na izradi oko 4 kilometra moderne javne rasvjete u Podorašju 2 (naselje Drapnici), gdje Općina i mještani podjednako finansiraju izgradnju iste, a radovi bi se trebali završiti u narednih mjesec dana. Slične aktivnosti se vode i u Babunovićima, gdje se radi o projektu javne rasvjete koji će koštati blizu 150.000 KM, a navedene aktivnosti su bile malo usporene jer se čekalo sa rekonstrukcijom NN mreže „Elektro-distribucije“ Srebrenik, kako bi se njihovi AB stubovi iskoristili i za javnu rasvjetu te time smanjila vrijednost investicije.

Otvorena manifestacija "OGUS 2010"

U nedjelju 01.08.2010.g., na Starom gradu iz 1333.godine u Gornjem Srebreniku, zvanično je otvorena ovogodišnja kulturna manifestacija „OGUS 2010“ (Srebrenik otvoreni grad umjetnosti), koja se tradicionalno obilježava još od davne 1977. godine. Pred više stotina posjetilaca, uoči zalaska sunca, zvucima zurlaša započeo je ovogodišnji OGUS, a nakon uvodnih zvuka iz frula, zurla i bubnjeva domaćih svirača, gostima se obratio općinski načelnik Osman Suljagić



Načelnik Osman Suljagić i čuveni sazlija Hašim Muharemović

koji je između ostalog kazao: - Nakon što se OGUS obilježava sada već 33 godine, vidimo da svake godine ova manifestacije postaje sve veća i sve bolja. Želim da se zahvalim Husejnu Leliću, tadašnjem načelniku općine Srebrenik, koji je i pokrenuo ovu manifestaciju, a svima nama da ovaj naš Stari grad dovedemo u što bolje stanje, kako bi što više turista posjećivalo kako ovu tvrđavu tako i kompletnu općinu Srebrenik. Manifestaciju je zvanično otvorila ministrica obrazovanja, nauke, kulture i sporta u Vladi TK, Mirzeta



OGUS 2010 je zvanično otvorila ministrica Mirzeta Hadžić-Suljkić

Hadžić-Suljkić, koja je između ostalog kazala: - Moram priznati kako umjetnici jednostavno ne mogu odoljeti Srebreniku, jer ove godine ih je ovdje 13 više nego prošle godine. Jednostavno i mi moramo naučiti da njeguemo umjetnost, jer vidimo da je ovaj naš OGUS

originalan i specifičan. Zato podržite ovu manifestaciju jer umjetnost jednostavno ne poznaje granice, istakla je ministrica Hadžić-Suljkić. Nakon ovih uvodnih riječi i zvaničnog otvorenja OGUS-a, gostima se sa dvije sevdalinke predstavio i doktor Hašim Muharemović, legendarni sazlija iz Srebrenika, zatim Dženana Husejnagić, mlada tuzlanska pjevačica, te Kulturno-umjetničko društvo „Mehmed Ibrahimović“ i plesna grupa „Gradskog teatra“ Srebrenik. Potom je na platou ispred Starog grada izvedena predstava „Legenda o gradu“ u režiji Milenka Iliktarevića, a u scenariju Sadila Mehmedovića, koju su igrali uglavnom glumci iz Srebrenika i to: Fatima Džaferović, Siniša Kahvić, Damir Mašić, Dženana Džanić, Dražen Pavlović, Mašo i Majda Mehmedović.

Djeca slikaju svom gradu i Djeca pjevaju hitove

U sklopu „OGUS-a 2010“, na Trgu Alije Izetbegovića u Srebreniku, održane su manifestacije za djecu pod nazivom «Djeca slikaju svom gradu» i «Djeca pjevaju hitove». Oko 200 mališana uzrasta od 2 do 12 godina, na rolni papira dugačkoj oko 30 metara, zajednički crtajući predmete prema slobodnom izboru, imalo je priliku izraziti svoju kreativnost i slikarsko umijeće. Najčešći motiv je bila Gradina i planina Majejica, a sve radove su ocijenili



Djeca su pokazala umijeće u crtanju

li umjetnici koji borave u ovogodišnjoj koloniji OGUS-a. Ovom prilikom svim mališanima su uručeni i prigodni pokloni. Nakon ovog događaja na istom mjestu je održana tradicionalna manifestacija «Djeca pjevaju hitove», koju su zajednički organizirali Organizacioni odbor OGUS-a i KUD «Mehmed Ibrahimović» Srebrenik. Na festivalu, koji je i ovog puta bio revijalnog karaktera, predstavilo se 9 učenika iz srebreničkih osnovnih škola, mladih izvođača narodne muzike, čiji je nastup pratilo blizu 1.000 posjetilaca. Nastupili su: Lejla Zahirović, Enida Šiljić, Asja Moranjkić, Armin Hogić, Azem Šerifović, Alija Bećirović, Novalija Husejnović, Fikret Jašarević i Adis Hodžić. Organizatori su svim učesnicima uručili prigodne poklone.

Održan 3. BiH festival "Zvuci Starog grada" te koncert zabavne muzike "Kice i bend"



Detalj sa festivala

U okviru kulturne manifestacije „OGUS 2010“, dana 03.08.2010.godine u 20 sati, na Trgu Alije Izetbegovića u Srebreniku, pred nekoliko hiljada posjetilaca, održan je 3. Bosansko-hercegovački festival narodne muzike pod nazivom „Zvuci Starog grada“. Na festivalu je učestvovalo ukupno 16 izvođača iz cijele BiH, a da sve protekne u najboljem redu, pobrinuo se „Musik-VIK“ na čelu sa Vehbijom Ibrahimovićem-Kigenom, koji se još jednom pokazao odličnim organizatorom ovakvih muzičkih događaja.



Festival narodne muzike je pratilo nekoliko hiljada građana

Voditelj manifestacije je bio Enver Šadinlija, a obzirom da ove godine festival nije bio takmičarskog karaktera nisu ni proglašavani pobjednici. Narednog dana u 20 sati održan je uspješan koncert zabavne muzike "Kice i bend". Mladi pjevač Enver Lugavić Kice, koji je prve muzičke korake napravio u Banovićima je, nakon šestomjesečnog takmičenja u SuperNova izboru talenta BiH 2003. osvojio drugu poziciju, slavu i hiljade obožavatelja, te se sa pravom može reći da je postao muzička zvijezda u BiH, a što je dokazao i svojim nastupom pred srebreničkom publikom.

Održane promocije knjige, časopisa i filma

Dana 05.08.2010.godine, na otvorenoj pozornici na trgu Alije Izetbegovića u Srebreniku, u sklopu OGUS-a 2010, održana je promocija tri kulturna sadržaja, kojima je prisustvovalo oko stotinjak građana. Riječ je o promociji knjige «Fantazmagorije vremena», autora Nurkanović Kemala, dvobroja časopisa «Biljeg Srebrenika» te filma



Sa promocije romana „Fantazmagorije vremena“ autora Nurkanović Kemala

„Srebrenik Stoni grad“. Nurkanović Kemal je rođen 1950. godine u Seoni, općina Srebrenik. Penzioner je i živi sa suprugom Senkom u Srebreniku. Do sada nije pisao i ovo mu je prvi roman, koji prema riječima promotora, istaknutih BiH književnika Atifa Kujundžića i Nijaza Alispahića, govori o raspadanju ljudskog bića i zlu koje je u vihoru rata zadesilo građane BiH i ima



Detalj sa promocije časopisa „Biljeg Srebrenika“

zavidan nivo kvaliteta. Odlomke iz romana je čitao mladi srebrenički glumac Kahvić Siniša. U novom dvobroju (7 i 8 broj) časopisa «Biljeg Srebrenika» obrađeno je desetak tema iz bogate kulturne historije Srebrenika, te predstavljeni najznačajniji kulturni događaji u Srebreniku u protekloj godini. Prema riječima autora dr. Edina Mutapčića, nastavljen je kontinuitet izlaženja ovog časopisa za kulturnu historiju i pored velikih teškoća, što je samo po sebi veliki uspjeh. –Onaj koji ne poznaje svoju prošlost, stranac je u vlastitoj domovini-između ostalog izrekli su promotori „Biljega Srebrenika“ prof. Rusmir Djedović i dr. Omer Hamzić iz Gračanice. Na kraju je prikazan film „Srebrenik Stoni grad“, posvećen kulturi, tradiciji i običajima Srebrenika i njegove okoline.

Održana manifestacija Vinkovačko veče

Dana 06.08.2010.godine, na otvorenoj pozornici na trgu Alije Izetbegovića u Srebreniku, održana je manifestacija pod nazivom „Vinkovačko veče“. U okviru programa posjetioci su prvo imali priliku pogledati izvrsnu pozorišnu predstavu 'Brak iz Aleje kestenova' u izvedbi Gradskog kazališta 'Joza Ivakić' iz Vinkovaca. Predstavu je režirao Robert Krajinović, glavne uloge su tumačili Vladimir Andrić i Lana Delić, a nastala je po tekstovima britanskog



Detalj sa pozorišne predstave Brak iz Aleje kestenova književnika Teda Whiteheada. Predstavom dominira pitanje lažnog morala i blještavila. U središtu pažnje je imućni mladi bračni par a do zapleta dolazi kada muškarac pokušava napustiti bračnu zajednicu dok s druge strane njegovoj supruzi, upravo zbog imućnosti, odgovara zadržati ga u braku. Predstava u stvari govori o braku koji je izgubio sadržaj, ali zadržava formu - postoji samo zbog susjeda, rodbine... Sa dosta komičnih



Nastup tamburaškog orkestra Dike

situacija predstava je uspjela zabaviti preko stotinjak gledalaca u Srebreniku, ali nadamo se i potaknuti na razmišljanje o vlastitoj iskrenosti prema životnim partnerima. U nastavku programa posjetiocima su se predstavili članovi tamburaškog orkestra „Dike“ iz

Vinkovaca, koji su izvedbom pjesama iz Slavonije, kao i vlastitim obradama sevdalinki, oduševili, nažalost tada već malobrojne posjetioce. Gostovanje Gradskog kazališta i tamburaškog orkestra rezultat je višegodišnje uspješne saradnje gradskih vlasti Vinkovaca i Srebrenika, ali i kulturnih i sportskih društava ova dva grada.

Održana smotra folklora i koncert duhovne muzike

U subotu 7. avgusta 2010.g. sa početkom u 20 sati, u sklopu realizacije programskih sadržaja „OGUS-a 2010“ i obilježavanja 35. godišnjice postojanja i rada Kulturno-umjetničkog društva „Mehmed Ibrahimović“, u Srebreniku je održana smotra folklora, na kojoj je, uz domaćine, učestvovalo još pet KUD-ova. Rođendansku proslavu jednog od najstarijih kulturno-umjetničkih društava na području Tuzlanskog kantona svojim dolaskom uveličali su članovi kulturno-umjetničkih društava „Preporod“ Vitez, „Gračanica“ Zenica, „Borac“ Travnik, „Busovača“ iz Busovače i „27. juli“ Prkosovići. Obučeni u živopisne narodne nošnje, domaćini i njihovi gosti održali su defile ulicama Srebrenika, a potom su na otvorenoj pozornici na



Defile KUD-ova ulicama Srebrenika

Trgu Alije Izetbegovića u Srebreniku upriličili cjelovečernji kulturno-umjetnički program. Velik broj posjetilaca okupljenih na glavnom gradskom šetalištu imao je priliku uživati u spletu igara iz Bosne i Hercegovine, ali i iz svih krajeva s prostora bivše zajedničke države. Narednog dana u 19,30 sati trebala je biti upriličena izložba umjetničke fotografije, ali ista, nažalost, nije održana, dok je u 20 sati održano zanimljivo muzičko veče duhovne muzike uz nastup ansambla „ETNO ART“ iz Gračanice, koji su se predstavili zanimljivim obradama tradicionalnih sevdalinki. Realizacijom navedenih sadržaja je i završen program ovogodišnjeg OGUS-a, za koji bi mogli reći da je bio na nivou dosadašnjih, kako obimom tako i kvalitetom.

Obilježeno 40 godina Festivala u Čehajama

Sredinom jula 2010. godine, u Sportskoj dvorani u Srebreniku, održan je 40. revijalni amaterski Festival narodne muzike „Fest Čehaje 2010.“ Riječ je o jednom od najbolje organizovanih amaterskih festivala u BiH, po kojem je 70.-ih i 80.-ih godina prošlog vijeka Srebrenik bio prepoznatljiv na širim bh. prostorima. U toku četiri decenije postojanja ove muzičke manifestacije, na „Festu Čehaje“ po prvi put su, kao pjevači-amateri, zapjevala mnoga danas poznata lica



Detalj sa festivala „Fest Čehaje 2010“

s bh. estradne scene, a kao specijalni gosti nastupali su brojni doajeni sevdalinke i poznati pjevači narodne muzike. Voditelj programa Agan Djedović, podsjetio je na stara dobra vremena, kada je vodio program, a danas se direktor radio-stanice „Studio D“ rado sjeća nekadašnjih vremena: -Moram priznati kako smo se ovim Festivalom vratili u 70-te i 80-te godine, kada su ovdje gostovali Halid Bešlić, Hanka Paldum, Sinan Sakić, Meho Puzić, Vesna Zmijanac, Muharem Serbezovski, Himzo Polovina, Emina Zečaj... Ljudi koji su pokrenuli ovaj Festival bili su Senahid Suljagić, Asim Ibrić, Đulaga Smajlović, Osman Suljagić- današnji načelnik Općine i mnogi drugi koji su zadržali kontinuitet, kazao je Djedović. Nakon što su Agan Djedović, Asim Ibrić i Ešref Berbić podsjetili na prve godine jednog od najstarijih amaterskih festivala narodne muzike u BiH, prvi na scenu je izašao Fajko Juničić, prvi pobjednik „Festa Čehaje“, koji je pokazao da je i danas vrstan interpretator sevdalinke. Velikom broju okupljenih istinskih ljubitelja sevdalinke, kojima je ovo bila i prilika da se prisjete svoje mladosti, predstavili su se i Sabira Smajlović, Vedad Ibrić, Tahir Fazlić, Mujo Delić, Teufik Kešetović, Ševal Muslimović, Zurahid Mujčinović, Osman Hadžić, izvorna grupa „Bijelić-Beganović“ i još desetak pjevača-amatera koji su u protekle 4 decenije nastupali na ovoj manifestaciji. Pozivu organizatora odazvao se i poznati bh. pjevač narodne muzike Nihad Kantić Šike, dvostruki pobjednik „Festa Čehaje“, koji je upravo na pozornici ovog amaterskog festivala započeo svoju uspješnu muzičku karijeru. Ovog puta „Fest Čehaje“ imao je samo revijalni karakter, a već od naredne godine predstavnic

Organizacionog odbora planiraju ponovo organizirati takmičenje pjevača-amatera, kako bi se nastavila tradicija jednog od najuspješnih bh. festivala.

Završena likovna kolonija „Majevica 2010“

Manifestacija svečanog zatvaranja likovne kolonije Majevica 2010 održana je u nedjelju 6. juna 2010. u restoranu „Mehana Stari Grad“ u Srebreniku. Deset slikara iz BiH, Srbije i Hrvatske i ove godine je pod motom „umjetnici spašavaju Majevicu“ likovnim kreacijama pokušalo skrenuti pažnju na Majevicu kao jednu od najljepših planina na



Balkanu, na kraljevski grad Srebrenik i naravno na slikarstvo kao umjetnost i jedino oružje koje imaju, u kontinuiranoj borbi za slobodu izražaja, mišljenja i stvaranja. Upravo je to kazao slikar Svjetlan Bešlić, organizator prve privatne kolonije u Regiji, zahvaljujući se svim učesnicima, gostima i sponzorima Kolonije. Iako je rad kolonije neprestano ometala kiša, padajući neprestano skoro svih dana trajanja ovog kreativnog druženja, slikari su pokazali nesvakidašnju žed za stvaranjem: -Majevica je bila veoma inspirativna. Stalna kiša i magla čak su bili poseban izazov da na platna



Detalj sa zatvaranja likovne kolonije „Majevica 2010“

prenesemo i takve slike planine-ljepotice. Nismo mogli slikati na otvorenom, ali posebnu draž dali su i poredani štafelaji pored naloženog kamina u mjesecu junu, na 800 metara nadmorske visine, kazao je Bešlić. Radovi nastali na ovogodišnjoj slikarskoj koloniji Majevica 2010, bit će kao zasebna izložbena postavka prikazani javnosti početkom naredne godine u okviru manifestacije „Dani povelje 2011“ u Srebreniku.

Prohodao Damir ef. Babajić

Damir ef. Babajić iz Rašljeve kod Gračanice, imam u džematu Dedići u Srebreniku, u protekle dvije godine prošao je kroz pravu golgotu kakvu, kako sam kaže, ne bi poželio ni najvećem dušmanu. No, nakon teških muka i velikih iskušenja, na kraju se sve završilo onako kako nisu mogli očekivati ni najveći optimisiti. Naime, nakon dvije godine provedene u invalidskim kolicima, ovaj 27-godišnji imam ponovo




je uspio stati na svoje noge. Njegova golgota počela je 6. juna 2008. g. u Bjelavama kod Srebrenika, kada je na putu prema džamiji u ovom naselju, gdje je namjeravao prisustvovati vjerskoj svečanosti uoči njenog otvorenja, u stražnju stranu njegovog „pasata“ u punoj brzini

udario „golf“ za čijim upravljačem je bio nesavjesni mladić iz Tuzle. Iako je na prvi pogled izgledalo da se ne radi o teškoj nezgodi, zbog oštećenja kičme ostao je nepokretan i prikovan za invalidska kolica. Bio je to veliki šok za ovog mladog imama i nogometnog sudiju, od kojeg se u početku veoma teško oporavio. No, čvrsta vjera u Alaha dž.š. i velika upornost, ali i ogromna podrška prijatelja i svih građana Srebrenika koji su sve ovo vrijeme bili uz njega, rezultirala je time da je nakon dvije godine provedene u invalidskim kolicima ponovo prohodao. Naime, prije nešto više od godinu dana, kada mu je, uz to što je bio u invalidskim kolicima, prijetila opasnost da mu i ruke ostanu nepokretne i da bubrezi prestanu funkcionisati, pojavio se tračak nade u vidu informacije da na klinici „Neurovita“ u Moskvi uspješno uzgajaju i presađuju analogne ćelije kičmene moždine. No, za tri tretmana na klinici u Moskvi trebalo je izdvojiti 130.000 KM, koje ovaj mladi imam nikako nije bio u stanju osigurati. Tada su Općina Srebrenik i Medžlis IZ Srebrenik, te Organizacioni odbor u sastavu: Admir Dorić, Zijad Bašić, Edin Husić, Dževad Muminović, Nermin Mujkić i Edib Kravić pokrenuli jednu od najvećih humanih akcija organiziranih u Srebreniku. Akciju su, uz velik broj dobrih ljudi, firmi i institucija, podržali i Muftijstvo Tuzlansko i Behram begova medresa iz Tuzle, a održano je i nekoliko humanitarnih koncerata, na kojima su učešće uzele i najveće bh. estradne zvijezde poput Hanke Paldum i Halida Bešlića. U ovim akcijama prikupljeno je neophodnih 130.000 KM za liječenje u Moskvi, a nakon posljednjeg tretmana

presađivanja ćelija kičmene moždine nedavno je Damir ponovo ustao na svoje noge. – „Nikad se ljepše u životu nisam osjećao i ovaj osjećaj ne bih dao ni za što na svijetu, a vjerujem da se lijepo osjećaju i svi oni koji su pomogli da se prikupe ogromna sredstva za moje liječenje. Ovo je naša zajednička pobjeda, jer bez pomoći organizatora akcije i velikog broja dobrih ljudi vjerovatno ne bih dočekao ovaj najsretniji dan u svom životu“, ističe ef. Babajić, naglašavajući da jedva čeka dan kada će se ponovo vratiti u svoj džemat. – „Sada planiran upisati postdiplomski studij na Fakultetu islamskih nauka i ponovo se vratiti svom poslu, jer mi je sve ovo vrijeme najveća želja bila da ponovo obučem džube i na glavu stavim ahmediju. To je za mene jedna od najčasnijih profesija kojoj se želim što prije vratiti“, ispričao nam je ef. Babajić. Zahvaljujući tretmanima u Moskvi, ef. Babajić sada je u stanju kretati se na svojim nogama uz pomoć štaka, a za potpuno ozdravljenje, prema preporuci ljekara iz Moskve, potrebne su još dvije godine intenzivne fizikalne terapije i uzimanja skupocjenih lijekova. Svi koji žele pomoći ovu posljednju fazu njegovog oporavka, koja će koštati oko 10.000 maraka, svoje dobrovoljne priloge mogu uplatiti na devizni račun „SWIFT-TBTUBA22 IBAN: BA391321510257708661, poziv na broj: 102577086 ili na žiro-račun otvoren kod NLB Tuzlanske banke broj: 1321502007793477, s naznakom za liječenje Damira ef. Babajića.

Za Stub srama 85 pari cipela

Na području općine Srebrenik prikupljeno je 85 pari cipela za „Stub srama“ u Srebrenici, koji će simbolizirati i sjećati na više od 8.000 žrtava počinjenog genocida na ovome dijelu BiH. Sabirni centar bila je JU „Sportsko-rekreativni centar“ Srebrenik, a koordinator za ovo općinsko područje bio je Fadil Duranović. – Iako sam očekivao da ćemo prikupiti znatno više cipela, moram biti sretan i zadovoljan što su ljudi u ovoj Općini prepoznali važnost ovog projekta



Fadil Duranović: Uspješna akcija

i da se suosjećaju sa žrtvama genocida u Srebrenici, kazao je Duranović, koji je predao obuću „Udruženju žena Srebrenice“. Inače, njegova pjesma „Srebrenica Identitet“ koja je objavljena u zbirci pjesama „Živim tiho“ prevedena je na njemački i engleski jezik, te će po svemu sudeći biti ispisana na „Stubu srama“ Srebrenice.

U G. Hrgovima održana "Žetva 2010"

U organizaciji Udruge „Sinija“ iz Špionice, na imanju Ive Marojevića u Gornjim Hrgovima kod Srebrenika, sredinom jula mjeseca održana je manifestacija „Žetva 2010“, na kojoj su organizatori željeli da prikažu kako i na koji se način nekada proizvodila hrana. – Želimo da novim generacijama ukažemo kako trebaju više vrednovati hranu koja se proizvodi u našim krajevima, da je tada blagostanje veće, da znaju više cijeniti svoje roditelje koji su na težak i mukotrpan način dolazili do hrane. Ovim želimo



Detalj sa manifestacije "Žetva 2010"

zadržati našu kulturnu baštinu, a samim tim i značajnije započeti sa razvojem seoskog turizma, kazao je prilikom obraćanja gostima, Nikola Veselčić, predsjednik Udruge „Sinija“. Uz zvuke tambure i šargije, obučeni u tradicionalnu narodnu nošnju, domaćini su se potrudili da gostima ništa ne nedostaje, a nakon uvodnih riječi pristupilo se demonstraciji košenja pšenice, a potom i njenoj vršidbi na mašinama starim blizu 100 godina. Manifestaciju je otvorila Jasminka Mijatović, ministrica pravosuđa u Vladi TK, koja je na licu mjesta odlično demonstrirala vještine u košenju pšenice kao i njen kolega Mijo Krešić, zamjenik ministra sigurnosti BiH, a među gostima su bili hrvatski konzul Josip Juras, zatim Ivo Andrić-Lužanski, Sabina Softić stručni saradnik Turističke zajednice TK, Nusret Šerifović, direktor Poljoprivrednog zavoda TK, Jakub Suljkanović, šef Službe za budžet, nadzor i poduzetništvo u Općini Srebrenik, te mnogi drugi.

Održan "Rock am Lipik 2010"

Sredinom jula 2010.g. održan je četvrti po redu „Rock am Lipik“. Zbog loših vremenskih prilika koje su posljednjih godina pratile ovaj jedinstveni muzički događaj, organizatori UG „Generacija bez kompasa“, su odlučili pomjeriti termin održavanja za početak jula i to se pokazalo kao odličan potez. Na lokaciji „Donja kasarna“ ispod samog vrha „Okresanica“



Sa nastupa grupe „Instant karma“

na Majevici sakupilo se oko 600 ljubitelja muzike i boravka u prirodi. Ove godine, prije svega zahvaljujući ugodnim temperaturama formirano je i mjesto za kampovanje, tako da je dvadesetak naših sugrađana spavalo pod vedrim nebom uživajući u ugodnim ljetnim noćima. Posebno raduje činjenica da je i na „Rock am Lipik 2010“ debitovao jedan domaći bend. Naime, po već ustaljenoj tradiciji festival je otvorio najmlađi srebrenički rock bend, a ove godine je to bio bend „UltraZvuk“. Potpomognuti najboljim vokalom sa naših prostora – Hasanom Hasom Nurkanovićem – podigli su na noge sve prisutne i najavili da će se za njih itekako čuti. Slijedili su ih prošlogodišnji debitanti, srebrenički sastav „RAiN“, koji već iza sebe ima nekoliko nastupa na motorijadama i sličnim manifestacijama. Nakon njih, nastupio je još jedan srebrenički bend – debitant iz 2007. godine „Paranoica“, a onda su na red došli gosti. Bend iz Odžaka zvučnog naziva „Švorc“ je publici poklonio sat i po odlične svirke, a zvijezde večeri svakako su bili momci iz benda „Instant karma“ iz Zrenjanina, Srbija. „Instant karma“ iza sebe ima već 7 studijskih albuma,



Nastup benda „UltraZvuk“

nebrojeno puno nastupa, tako da je njihov odličan zvuk apsolutno iznenadio sve prisutne. Vjerovatno je to jedan od najboljih bendova koji su ikada gostovali u Srebreniku, tako da raduje činjenica da im se jako sviđelo kod nas i obećali su da će se rado odazvati i ubuduće. Kao šlag na kraju, nastupio je domaći bend „Generacija bez kompasa“ u postavi u kojoj su snimili njihov jedini dosadašnji CD. Muzički dio završen je skoro dva sata iza ponoći, a druženje je nastavljeno sve do ranih jutarnjih sati. Organizacija ne bi bila moguća bez brojnih sponzora kao i svih ostalih koji su, svojim nesebičnim radom i zalaganjem, učinili da sve prođe u najboljem redu.

Otvorena nova džamija u naselju Uroža

U prisustvu predstavnika vjerskog, kulturnog i političkog života općine Srebrenik i Tuzlanskog kantona, te nekoliko hiljada vjernika, dana 07.08.2010.godine, u naselju Uroža kod Srebrenika, svečano je otvorena nova džamija. U povodu otvorenja novosagrađene džamije proučen je mevlud i šerif, a vjernicima su se obratili Osman Suljagić, načelnik općine Srebrenik, Refik ef. Hodžić, glavni imam Medžlisa IZ Srebrenik, Idriz ef. Memić, izaslanik



Detalj sa otvorenja džamije u Uroži

tuzlanskog muftije i Hasan ef. Makić, izaslanik reisu-l-uleme Mustafe ef. Cerića. Čestitajući džematlijama Urože na ovom velikom hajirli djelu, ef. Makić je naglasio da izgradnja svake nove džamije predstavlja jednu novu veliku pobjedu sljedbenika Islama. – „Džamije su mjesta koja će koristiti samo dobru, odnosno učvršćivanju naše sloge, jedinstva i zajedništva. Mi smo čuli da je ova džamija koštala skoro 200.000 KM, neko može reći ona je puno koštala, ali ona ne može biti skupa kad jedno dijete odgoji, jer odgoj jednog djeteta nipošto ne može biti skup, a kamo li generacija i generacija mladih koje će ova džamija odgajati. I sve što se uloži u džamiju to se višestruko nagradi i zato smo



Ugledni gosti na otvorenju džamije u Uroži

dužni da podržimo ove džematlije moralno, ali i materijalno, jer to oni sigurno zaslužuju“, istakao je ef

Uručena priznanja najzaslužnijima

U okviru vjerske svečanosti u Uroži uručene su zahvalnice i vakufname zaslužnim pojedincima za doprinos u izgradnji džamije. Zahvalnice su dobili Osman Suljagić i Halid Kovač, dok su vakufname dodijeljene Mehmedu Deliću, Nafilu Fetahoviću, Feridu Deliću i Hazimu Bašiću. Prema kriteriju doprinosa izgradnji džamije u Uroži, čast da otvore ovaj vjerski objekt pripala je članovima Građevinskog odbora Murselu, Rasimu i Hamzaliji Deliću, te Mirsadu Bašiću i Muameru ef. Bećiroviću.

Makić, naglasivši da u današnje vrijeme kada imamo ovoliki broj džamija nema razloga da više niti jedno dijete odraste bez mekteba. U izgradnju džamije u Uroži uloženo je oko 180.000 KM, a najveći dio sredstava donirali su mještani ovog naselja. Iako je riječ o jednom od najmanjih džemata na području Medžlisa Srebrenik, džamija u Uroži izgrađena u rekordno kratkom vremenu, jer je od polaganja kamena temeljca do svečanog otvaranja proteklo svega 12 mjeseci.

Ramazanski bajram u Srebreniku

Centralna manifestacija obilježavanja Ramazanskog bajrama održana je u Gradskoj džamiji u Srebreniku, gdje je klanjanju bajram namaza prisustvovalo nekoliko stotina vjernika. Na isti način je, u svečanoj atmosferi, klanjan bajram namaz i u ostalih četrdesetak džemata Medžlisa IZ Srebrenik,



Sa prijema u Medžlisu IZ Srebrenik

nakon čega je upriličen tradicionalni obilazak roditelja, rodbine i komšija. Obilježavanje Dana šehida na drugi dan Bajrama, na području općine Srebrenik, započelo je posjetom prvih ljudi izvršne i zakonodavne vlasti Medžlisu Islamske zajednice. Tom prilikom istaknuta je izuzetno dobra saradnja između Općine Srebrenik i ove vjerske institucije na planu organizovanja vjerskog života, a kako su ovom prilikom istakli predsjedavajući OV-a Ibrahim Zukić i općinski načelnik Osman Suljagić u narednom periodu bi se trebale okončati i aktivnosti oko izgradnje nove čaršijske džamije u Srebreniku. U nastavku obilježavanja drugog dana Ramazanskog bajrama, uz obilazak šehidskih mezarja i učenja tevhida pred duše šehida, delegacije Općine Srebrenik i boračkih (nastavak na narednoj strani) ➡



Polaganje vijenaca na spomen-obilježje u MZ Čojluk

udruženja svečano su položile cvijeće na Centralno spomen-obilježje na gradskom šetalištu u Srebreniku. Centralna svečanost upriličena je u MZ Čojluk, odn. u N.N. Polje, gdje je otkriveno spomen-obilježje šehidima i poginulim borcima. Ni prohladno i kišovito vrijeme nije onemogućilo više stotina prijatelja, rodbine, komšija i gostiju, da prisustvuju otvorenju šehidskog spomen-obilježja za trojicu pripadnika Armije BiH iz ovog mjesta, koji su položili svoje živote za odbranu Bosne i Hercegovine. Projekat koji je vrijedan oko 18.500 KM, finasiran je uglavnom iz budžeta Općine, dok je jedan



Trenutak otvorenja spomen-obilježja

manji dio izdvojilo i Ministarstvo za boračka pitanja TK-a. Obzirom da je resorni kantonalni ministar Bahrija Mehurić bio je sprečen da se pojavi, u ime Vlade TK-a prisutnima se obratio Faruk Vikalo, ministar za rad i socijalnu politiku, kao i načelnik Osman Suljagić, glavni imam Medžlisa IZ Srebrenik Refik Hodžić, te predsjednik MZ Čojluk Hajrudin Sinanović. On je goste upoznao o dinamici radova, koje su uspješno izvele firme „ITK Musić“ i „Osmo“ iz Tinje, dok je spomenik projektovao poznati arhitekta iz Srebrenika Ibrahim Smajlović. Načelnik Suljagić je u prigodnom govoru istakao kako se sinovi Bosne, koji su dali svoje živote nikada ne smiju zaboraviti jer su nas oni time obavezali davanjem svojih života za odbranu BiH. Trećeg dana ramazanskog Bajrama u kino sali Doma kulture u organizaciji Medžlisa IZ Srebrenik i Bošnjačke zajednice kulture „Preporod“, održana je i „Bajramska akademija“.

Bajramske aktivnosti BiZ-a i Centra za socijalni rad

U povodu bajramskih praznika, predstavnici Općinske službe za BiZ Srebrenik obavili su tradicionalni obilazak porodica šehida i poginulih boraca na području srebreničke općine. Kao i

svih prethodnih bajramskih praznika, i ovog puta su posjetili oko 300 porodica i tom prilikom im uručiti prigodne prehrambene pakete. – „Uz uručenje prehrambenih paketa, ove tradicionalne posjete šehidskim porodicama prilika su i za razgovor o problemima s kojima se suočavaju i načinima na koje im mi možemo pomoći. Nažalost, ima dosta starih i iznemoglih roditelja šehida, koji sami žive u svojim kućama i kojima mi za bajramske praznike, sa skromnim bajramskim poklonima, prvi pokucamo na vrata. Naše im posjete izuzetno mnogo znače i zbog toga



Podjela paketa

ćemo i u narednom periodu nastaviti s podjelom bajramskih poklona, ali i redovnim obilascima na godišnjicu stradanja šehida koje praktikujemo već godinama.“, ističe Teufik Smajlović, namještenik Službe za BiZ Općine Srebrenik. Kako ističe Smajlović, oni redovno obilaze i uručuju prigodne pakete i predstavnicima porodica 8 poginulih boraca hrvatske nacionalnosti u povodu Božića i ostalih katoličkih blagdana. Direktor Centra za socijalni rad Srebrenik



Detalj sa posjete prihvatnom centru "Duje"

Smajl Joldić i suvlasnik firme „Herceg“ d.o.o. Sulejman Herceg, uoči ramazanskog bajrama obišli su 22 osobe s posebnim potrebama koje borave u prihvatnom centru „Duje“ u Doboj Istoku. Direktor Joldić štićenike prihvatnog centra s područja srebreničke općine obradovao je novčanim prilozima od po 30 KM, dok im je Herceg uručio prigodne prehrambene pakete i novčane priloge od po 20 KM. Uz poklone osobama s posebnim potrebama, Herceg je uručio i posebnu donaciju prihvatnom centru „Duje“, koji vodi brigu o preko 280 štićenika, u iznosu od 2.000 KM. Tom prilikom je Herceg uputio apel i vlasnicima ostalih firmi da se barem u povodu bajramskih blagdana prisjete svojih sugrađana s posebnim potrebama i dio svog profita izdvoje za one kojima je pomoć najpotrebnija. Uoči bajramskih blagdana predstavnici firme „Herceg“ posjetili su i 30 socijalno ugroženih osoba na području općine Srebrenik i 20 prognaničkih porodica u izbjegličkom kampu u Špionici kod Srebrenika i uručili im prigodne poklone.

Praktične vježbe Gorske službe spašavanja

O d osnivanja „Gorske službe spašavanja“ u Srebreniku, prošlo je više od jedne godine, a nakon uvodnih teoretskih časova, krajem avgusta 2010.g., šestočlana ekipa predvođena rukovodiocem Elvirom Ćudićem, odradila je praktični dio na Starom gradu u Gornjem Srebreniku te, par dana nakon toga, i na Vatrogasnom domu u Srebreniku.



Sa vježbi na Starom gradu: Pokazali su veliku hrabrost
Penjanje i spuštanje na visokoj litici, odn. spašavanje građana iz visokih zgrada zahvaćenih požarom, bilo je imponantno gledati. -Ovo su prvi praktični časovi. Momci su voljni da vježbaju i vjerujem kako ćemo izrasti u jednu pravu spasilačku ekipu, kazao je rukovodilac Ćudić. Praktični dio koji je odraden pod nadzorom instruktora Bajre Imširovića, inače šefa Službe za Civilnu zaštitu u Općini Srebrenik, sadržavao je savlađivanje uspona uz penjanje sa tehnikama veranja i spuštanja. - Radimo dosta na samopouzdanju, jer vrlo je važno da ovim momcima, kada se nađu u potrebnoj situaciji, ne manjka samopouzdanja i da budu sigurni u sebe, kako se mogu uzverati do bilo kojeg mjesta, kazao je instruktor Imširović. „Gorska služba spašavanja“ djeluje u okviru „Planinarskog društva-Majevica“ i svi momci su volonteri, dakle rade bez ikakve naknade. Nabavka opreme kao i sredstva za obuku obezbijedena su iz budžeta Općine Srebrenik. Uz rukovodioca Elvira Ćudića, inače magistra sporta koji radi kao trener



Penjanje uz strmu liticu

odbojkašica Gradine-Herceg, Gorsku službu spašavanja čine Nedžad Djedović, inače predsjednik Planinarskog društva Majevica, Sedad Hodžić, Irfan Karić, Almir Suljić i Amer Djedović.

Održan Međunarodni kamp mladih Crvenog križa

Crveni križ općine Srebrenik i Klub mladih Crvenog križa općine Srebrenik, bili su domaćini Međunarodnog kampa mladih, koji se održao na Majevici. Tako je Planinarski dom na Lipicima ugostio mlade iz Tuzle, Lukavca, Banovića, Brčkog te iz Sombora, zbog čega je ovo okupljanje i dobilo međunarodni karakter. - Ovo druženje koje je trajalo pet dana, imalo je edukativni a i zabavni karakter. Mladi ljudi koji volontiraju u Crvenom križu, pokazali su zavidan nivo znanja, naučili su nešto novo, stekli nova prijateljstva i uz sve to dobro se zabavili, kazala je sekretar Crvenog križa općine Srebrenik, Faketa Ibrić. Međunarodnom kampu na obroncima planine Majevice prisustvovalo je 34 člana i to 19 iz gostujućih te 15 iz domaćih organizacija, a Amra Jahić, predstavnica Kluba mladih crvenog križa općine Srebrenik je kazala: - Nema



Učesnici međunarodnog kampa mladih

sumnje kako je ovo druženje dobro došlo, kako bi nešto novo naučili, utvrdili dosadašnja znanja, ali i razmijenili iskustva sa kolegama iz drugih udruženja. Najviše smo radili na tzv.markiranju i šminkanju i planiranju radnih poligona za pokazne vježbe, istakla je Jahićka.

Nesvakidašnji ulov

Šezdesetdvogodišnji Sead Sejdinović iz Tinje kod Srebrenika, koji već više od 30 godina živi i radi u Beču u Austriji, ostvario je ulov o kojem vjerovatno čitavog života sanja većina ribolovaca. Ovaj vrsni ribolovac u rijeci Savi na lokalitetu Skadar u blizini Svilaja, početkom avgusta 2010.g., ulovio je kapitalni primjerak soma dugačkog 2,35 metara i teškog blizu 70 kilograma. – „Zajedno sa sinom Denisom otišao sam u noćni ribolov na rijeku Savu, a strpljenje i čekanje skoro dva sata na kraju se isplatilo. Prvo sam upecao nekoliko primjeraka od po pet-šest kilograma, a onda se



Ulovljeni som od 70 kg

na moju udicu zakačila ova grdosija kakvu nisam vidio u svom životu. Uz pomoć sina Denisa i jednog starog alasa iz Odžaka kojeg svi poznaju po nadimku Hodža, ogromnog soma koji se zakačio za moju udicu „zamarao“ sam skoro sat i 15 minuta, jer da sam ga odmah pokušao izvaditi iz vode vjerovatno bi potrgao udicu i pobjegao“, ističe Sejdinović dok je na povratku iz Svilaja s ponosom pokazivao kapitalni primjerak soma velikom broju radoznalih prolaznika u centru Srebrenika. Zahvaljujući kvalitetu specijalnog konca, ali i umijeću ovog iskusnog ribara i njegovih pomagača, udica je izdržala sve trzaje ogromne ribe koja se pokušavala otrgnuti, a kako ističe Sejdinović, prilikom uvlačenja u čamac s kojeg je pecao, snažnim trzajem repa zamalo nije povrijedila njegovog sina Denisa. Ovaj strastveni ribolovac, kojem se ovog puta osmijehnula neizmjerena sreća, do sada je pecao skoro na svim vodama u BiH, ali i na velikom broju rijeka u Austriji, Njemačkoj, Danskoj i Švedskoj. Do sada je ulovio više kapitalnih primjeraka raznih vrsta ribe ali ovaj som ulovljen u rijeci Savi predstavlja rekord koji će biti teško dostignut.

Penzionisan učitelj Vlado

Dana 01.09.2010.godine, nakon 40 godina i 5 mjeseci učiteljskog staža, u zasluženu penziju je otišao dragi kolega i učitelj Vladimir Ilić.



Zajednička fotografija učitelja Vlade sa suprugom Adilom, kolegicom i učenicima kojima je do sada predavao

Tim povodom je 04.09.2010.godine u područnoj OŠ Gornji Hrgovi, u prisustvu brojnih kolega, prijatelja i poznanika kao i Vladinih bivših učenika, koji su ovom prilikom došli sa svih strana svijeta, kako bi iskazali dužno poštovanje prije svega velikom čovjeku i humanisti a tek poslije i velikom učitelju, održana prigodna svečanost. Vladimir Ilić sin Vase rođen je u Tinji, općina Srebrenik a učiteljsku školu je završio u Tuzli 1968. Godine. Od 1. septembra 1968 g. do 1974 g. radio je u područnoj OŠ Gornji Hrgovi, a od 1974 g. do 1999.g. radio je u centralnoj OŠ Špionica. Na traženje mještana Gornjih Hrgova 1999.g. ponovno postaje učitelj u školi u Gornjim Hrgovima, gdje je ostao sve do penzionisanja. Ne smijemo olako preći preko činjenice da je učitelj Srbin, oženjen Bošnjakinjom učiteljicom Adilom ostvario izuzetne rezultate u odgoju i obrazovanju u mjestu gdje žive samo Hrvati, jer je to mogao postići samo veliki čovjek, sposoban da uspostavi izuzetnu saradnju sa bilo kojom lokalnom zajednicom, te da proživljavanjem i dobra i zla sa svojim učenicima i njihovim roditeljima, posebno u periodu posljednjeg rata, postane i ostane kohezioni dio sredine u kojoj je radio. Kako je istakao Ilić redovno je sa učenicima aktivno sudjelovao u brojnim aktivnostima u Gornjim Hrgovima kao što su: „Dani kruha i plodova zemlje“, „Dani žetve“, renoviranje krovne konstrukcije škole... Na kraju svog prigodnog obraćanja učitelj Ilić je kroz suze istakao : -Strah me mirovine! Kako ću bez đaka? Tko će unositi veselost u moju svakodnevnicu? Oni su mi, pored moje obitelji, život! Kao učitelj postao sam i psiholog i pisac i pjesnik i ljekar, ali i mekušac, koji često pusti suzu iz oka zbog svojih đaka. Volim rečenicu „ Djeca su najveće blago na svijetu“ i srećan sam što su mi u životu bile pune ruke tog blaga!

Ovih par rečenica su samo jedan trenutak pažnje i svojevrsni omaž prema njemu, kao i brojnim drugim učiteljima i nastavnicima, o kojima nismo pisali, a koji su takođe ostavili neizbrisiv trag u životima brojnih pokoljenja koje su izveli na pravi put.

Na kraju dovoljno je ako kažemo **HVALA TI ZA SVE** što si učinio za nas od 1968. g. do danas.

Otvoren "In klub" za djecu s posebnim potrebama



Detalj iz In kluba

Udruženje civilnih invalida I i II kategorije Srebrenik nedavno je otvorilo takozvani „In klub“ za djecu s posebnim potrebama s područja srebreničke općine. Projekt je realiziran uz podršku MDG-F-a, UNICEF-a i UNESCO-a, a u novootvorenom „In klubu“ provodi se program inkluzije i resocijalizacije hendikepirane djece. Četiri dana u sedmici u ovom svojevrsnom dnevnom centru za osobe s posebnim potrebama angažovana su dva stalno zaposlena radnika i četiri mlada volontera, koji imaju završene fakultete za socijalni rad i rehabilitaciju hendikepiranih osoba. Jedan radni dan u sedmici rezerviran je za kućne posjete nepokretnim osobama s posebnim potrebama, a program u dnevnom centru podijeljen je na radne i zabavne sadržaje. Tako u okviru zabavnih sadržaja djeca crtaju, slikaju, pjevaju i sklapaju slagalice, dok u radnom dijelu dnevnog programa vježbaju pisanje, čitanje i pravilno izgovaranje riječi, te na specijalnim mašinama izrađuju bedževe i suvenire. Sve što mališani proizvedu prodaju u tržnim centrima i na posebnim štandovima u centru grada, a uskoro planiraju otvoriti i vlastitu prodavnicu za prodaju suvenira na lokalitetu Starog grada. U novootvorenom klubu boravi do 15 djece s posebnim potrebama, a cilj je da se mališani međusobno druže i da na jedan koristan način provode svoje slobodno vrijeme. U otvaranje dnevnog centra za djecu s posebnim potrebama uloženo je 30.000 KM, a sredstva je osiguralo Udruženje civilnih invalida I i II kategorije u saradnji s općinom Srebrenik i nevladinom organizacijom MDG-F.

Nevladinim organizacijama 9600 KM od UNDP-a

U motelu „Orion“ Ormanica kod Srebrenika, dana 30.07.2010.g., potpisan je ugovor između „UNDP“ – a i nevladinih organizacija Crveni krst i BZK „Preporod“ Srebrenik o realizaciji proje-



Sa potpisivanja ugovora sa UNDP-om

kata iz oblasti kulture i socijalne zaštite najugroženijih kategorija stanovništva na području ove općine. Projektom Crvenog krsta Srebrenik predviđeno je da se na osnovu ankete provedene na terenu, uspostavi baza podataka o socijalno ugroženim osobama koje su obuhvaćene programom socijalne zaštite niti jedne zvanične institucije, dok je projekat „Preporoda“ posvećen očuvanju i zaštiti kulturno – historijskog naslijeđa na području ove općine. Vrijednost ovih projekata je 9.600 KM, a sredstva za njihovu realizaciju osigurao je „UNDP“.

Čifluk i Duboki Potok najbolji na Omladinskim igrama

Pobjednik „Omladinskih igara-Srebrenik 2010“ (Lige MZ-a) u malom nogometu u seniorskoj konkurenciji je ekipa „Čifluk-ITK Musić“ koja je u finalu pobijedila „Babunoviće“ sa 4:1, dok su u pionirskoj konkurenciji prvi „Duboki Potok-Aksemont“ koji je u finalu pobijedio Falešiće sa 4:1. Treće mjesto u seniorskoj konkurenciji pripalo je ekipi „Gornji



Ekipa "Čifluk-ITK Musić"

Srebrenik“ koji je bio bolji od „Previla“ sa 3:1 a u pionirskoj konkurenciji „Srebrenik-S.P.Ljutko“ bio je bolji od „Babunovića-Bosel“ nakon penala sa 2:1. Najbolji golmani su Mirsad Husejnović (seniori) iz ekipe „Gornji Srebrenik“ i Emir Zukić (pioniri) iz „Duboki Potok-Aksemont“, a golgeteri su Mersed Ibršimović (seniori) iz „Čifluk-ITK Musić“ i Ahmed Šabić (pioniri) iz ekipe „Luka“. Učestvovalo je 28 ekipa u dvije konkurencije a organizatori JU „SRC“, „Općinski Sportski savez“ i „Fudbalski savez Općine Srebrenik“ dodijelili su novčane nagrade, pehare i diplome.